

Neslužbena prečišćena verzija Zakona o političkim organizacijama sadrži: Zakon o političkim organizacijama (Službeni glasnik Brčko distrikta BiH, broj 12/02), i izmjene i dopune Zakona o političkim organizacijama (Službeni glasnik Brčko distrikta BiH, brojevi: 19/07, 02/08).

ZAKON O POLITIČKIM ORGANIZACIJAMA (Neslužbena prečišćena verzija)

OSNOVNE ODREDBE

Član 1.

Ovim zakonom se uređuje način ostvarivanja slobode političkog organizovanja i djelovanja, uslovi i postupak osnivanja, registracije i prestanak rada političkih organizacija čije je sjedište u Brčko Distriktu Bosne i Hercegovine (u daljem tekstu: Distrikt).

Član 2.

Građani se slobodno politički organizuju i djeluju i u tom cilju mogu osnivati političke organizacije.

Član 3.

Političkim organizacijama se, u smislu ovog zakona, smatraju organizacije koje građani slobodno osnivaju i u koje se dobrovoljno udružuju radi ispoljavanja svojih političkih ideja i ostvarivanja svojih političkih ciljeva.

Član 4.

Nije dozvoljeno osnivanje i djelovanje organizacija čiji su politički ciljevi izraženi u statutu, programu ili nekom drugom aktu, usmjereni na ugrožavanje općeprihvaćenih principa demokratske vladavine i Ustavom Bosne i Hercegovine zajamčenih prava i sloboda.

Član 5.

Političke organizacije se ne mogu osnivati niti djelovati u institucijama Distrikta.

Član 6.

Rad političkih organizacija je javan, a javnost rada se osigurava dostupnošću statuta i programa organizacije, kao i održavanjem javnih skupova, saopćenjima za javnost, konferencijama za novinare i na drugi pogodan način.

Statutom političke organizacije se utvrđuju slučajevi u kojima organi organizacije mogu isključiti ili ograničiti pristup javnosti svom radu.

Političke organizacije su dužne omogućiti uvid nadležnim organima u njihovu djelatnost, a posebno u dokumentaciju koja se odnosi na finansiranje.

Član 7.

Političke organizacije imaju status pravnog lica.

Status pravnog lica stiče se upisom u sudski registar.

Član 8.

Političke organizacije se mogu baviti privrednom i drugom djelatnošću u skladu sa zakonom.

Član 9.

Na saveze i druge oblike udruživanja političkih organizacija shodno se primjenjuju odredbe ovog zakona.

Član 10.

Politička organizacija osnovana u skladu s ovim zakonom, može se udružiti sa drugim političkim organizacijama ili se može učlaniti u međunarodnu organizaciju, osim onih čije djelatnosti nisu u skladu s članom 4. ovog zakona.

OSNIVANJE

Član 11.

Političku organizaciju može osnovati najmanje 300 punoljetnih lica.

Svaki punoljetni građanin može, pod jednakim uslovima, postati član političke organizacije.

Član 12.

Osnivači i članovi političkih organizacija mogu biti samo državljani Bosne i Hercegovine.

Član 13.

Politička organizacija osniva se na skupštini osnivača na kojoj se donosi odluka o osnivanju, statut i program.

Član 14.

Odluka o osnivanju sadrži:

- 1) imena osnivača s njihovim potpisima;
- 2) naziv i sjedište političke organizacije;
- 3) ciljeve političke organizacije;
- 4) ime i prezime lica koje je ovlašteno za preduzimanje radnji vezanih za upis u sudski registar.

Član 15.

Statut sadrži, naročito, odredbe o:

- 1) političkim ciljevima i načinu njihovog ostvarivanja;
- 2) nazivu i sjedištu;
- 3) unutrašnjoj organizaciji;
- 4) uslovima i načinu učlanjivanja i prestanku članstva, pravima i obavezama članova;
- 5) organima i njihovim pravima, obavezama i odgovornostima, načinu djelovanja i odlučivanja, te biranja i smjenjivanja organa i lidera;
- 6) zastupanju i predstavljanju;
- 7) načinu sticanja, korištenja i raspolaganja sredstvima, kao i odgovornosti lica odgovornih za svaku od tih aktivnosti;
- 8) obezbjeđenju javnosti rada, kao i slučajevima isključenja ili ograničenja pristupa javnosti;
- 9) udruživanju u saveze i druge oblike udruživanja političkih organizacija;
- 10) načinu donošenja, izmjena i dopuna statuta;
- 11) prestanku rada.

REGISTRACIJA

Član 16.

Političke organizacije se upisuju u registar političkih organizacija koji vodi Osnovni sud Distrikta (u daljem tekstu: registarski sud).

U registar se upisuju podaci o osnivanju, nazivu i sjedištu, pravnom statusu, ciljevima, djelatnostima, imenima lica ovlaštenih za zastupanje, kao i podaci o drugim činjenicama bitnim za status političke organizacije kao pravnog lica.

Pravosudna komisija Distrikta će donijeti detaljne propise o načinu vođenja registra.

Član 17.

Zahtjev za upis u sudski registar mora se podnijeti u roku od 15 dana od dana osnivanja političke organizacije.

Uz zahtjev se podnosi odluka o osnivanju, statut i program političke organizacije.

Ako sud utvrdi da neki od akata iz prethodnog stava nije u skladu sa ovim zakonom ili da zahtjev za upis ima nedostatke zbog kojih sud ne može postupiti, upozorit će na to podnosioca zahtjeva i odrediti rok za otklanjanje nedostataka, koji ne može biti kraći od 15 dana ni duži od dva mjeseca.

Ako sud utvrdi da politička organizacija, koja podnosi zahtjev za upis u registar, sadrži u svom nazivu bitna obilježja neke druge političke organizacije, koja je već upisana u sudski registar, upozorit će na to podnosioca zahtjeva i odrediti mu rok za otklanjanje ovog nedostatka, koji ne može biti kraći od 15 dana ni duži od dva mjeseca.

Član 18.

Prilikom razmatranja prijava za registraciju političkih stranaka, nadležne sudije moraju se uvjeriti da:

Članovi centralnih statutarnih organa političkih stranaka, kao što su predsjedništvo, glavni ili centralni odbor, savjetodavni odbori ili savjeti, sudovi časti, te sva druga lica ili organi kojima su dana ovlaštenja prema statutu stranke, ili su im statutom organi stranke povjerili mandat da zastupaju stranku, su na odgovarajući način izabrani u skladu sa statutom od ovlaštene skupštine ili organa stranke, te da bilo kojem članu takvih organa ili licima na taj način ovlaštenim nije zabranjeno obavljanje stranačke funkcije u skladu sa zakonom uključujući i odluke Visokog predstavnika.

Član 19.

Sud je dužan da o zahtjevu za upis odluči u roku od 15 dana od dana prijema zahtjeva.

Ako su ispunjeni uslovi za upis utvrđeni ovim zakonom, sud će donijeti rješenje o upisu političke organizacije u sudski registar.

Prije donošenja rješenja o upisu u sudski registar, politička organizacija može obavljati samo djelatnosti iz članova od 11. do 14. ovog zakona.

Član 20.

Sud će rješenjem odbaciti zahtjev za upis u registar ako podnosilac zahtjeva u određenom roku ne otkloni nedostatke.

Sud će odbiti zahtjev za upis ako utvrdi da je politička organizacija osnovana protivno ovom zakonu.

“Rješenje kojim je odlučeno o zahtjevu za upis dostavlja se podnosiocu zahtjeva i tužiocu Distrikta.”¹

Član 21.

Ako politička organizacija izmijeni ili dopuni statut ili program, ili ako je došlo do promjene podataka koji su upisani u registar, politička organizacija dužna je obavijestiti sud u roku od 15 dana od dana nastalih promjena i dostaviti sudu izmijenjene podatke, odnosno akte kao i zapisnik sa sjednice na kojoj su usvojeni.

Član 22.

“U postupku registracije političkih organizacija shodno se primjenjuju odredbe Zakona o registraciji poslovnih subjekata u Brčko distriktu BiH („Službeni glasnik Brčko distrikta BiH” broj: 15/05).”²

PRESTANAK RADA

Član 23.

Politička organizacija prestaje s radom:

- 1) odlukom organa utvrđenog statutom;
- 2) ako se članstvo političke organizacije smanji ispod 50 članova;
- 3) ako ne obavlja djelatnosti utvrđene statutom u periodu dužem od jedne godine;
- 4) ako je političkoj organizaciji zabranjen rad u skladu sa zakonom.

¹ Zakon o izmjenama i dopunama Zakona o političkim organizacijama (Službeni glasnik Brčko distrikta BiH broj: 19/07)

² Zakon o izmjenama i dopunama Zakona o političkim organizacijama (Službeni glasnik Brčko distrikta BiH broj: 19/07)

Član 24.

Zahtjev za brisanje političke organizacije iz sudskog registra, zbog razloga iz tački 1 i 2 prethodnog člana, podnosi lice koje je ovlašteno za zastupanje organizacije u roku od 15 dana od dana nastupanja razloga.

“Zahtjev za brisanje političke organizacije, zbog razloga iz tačke 3 prethodnog člana podnosi tužilac.”³

Član 25.

Političkoj organizaciji će se zabraniti rad i brisat će se iz sudskog registra ako organizacija svojim aktima ili djelovanjem ugrožava vrijednosti utvrđene u članu 4. ovog zakona.

“Postupak za zabranu rada političke organizacije pokreće se na zahtjev tužioca, a odluku o zahtjevu donosi registarski sud.”⁴

Član 26.

“Ako je podnesen zahtjev za zabranu rada političke organizacije, sud će u roku od 8 dana održati pretres na koji će pozvati tužioca i predstavnika političke organizacije. Pretres će se održati i ako se jedna od uredno pozvanih strana ne odazove pozivu, a na to je izričito upozorena.”⁵

Član 27.

“Ako ovim zakonom nije drugačije određeno, u postupku zabrane rada političke organizacije se shodno primjenjuju odgovarajuće odredbe Zakona o krivičnom postupku („Službeni glasnik Brčko distrikta BiH„ brojevi: 10/03, 48/04, 6/05 I 12/07).”⁶

³ Zakon o izmjenama i dopunama Zakona o političkim organizacijama (Službeni glasnik Brčko distrikta BiH broj: 19/07)

⁴ Zakon o izmjenama i dopunama Zakona o političkim organizacijama (Službeni glasnik Brčko distrikta BiH broj: 19/07)

⁵ Zakon o izmjenama i dopunama Zakona o političkim organizacijama (Službeni glasnik Brčko distrikta BiH broj: 19/07)

⁶ Zakon o izmjenama i dopunama Zakona o političkim organizacijama (Službeni glasnik Brčko distrikta BiH broj: 19/07)

FINANSIRANJE

Član 28.

“Političke organizacije se finansiraju u skladu sa Zakonom o finansiranju političkih stranaka iz budžeta Brčko distrikta BiH.”⁷

NADZOR

Član 29.

Nadzor nad zakonitošću rada političkih organizacija vrše institucije Bosne i Hercegovine i Distrikta u okviru svojih nadležnosti utvrđenih zakonom.

⁷ Zakon o izmjeni Zakona o političkim organizacijama (Službeni glasnik Brčko distrikta BiH broj: 02/08)

KAZNENE ODREDBE

Član 30.

Novčanom kaznom od 10.000 KM kaznit će se za prekršaj politička organizacija:

- 1) ako nadležnom organu ne omogući uvid u djelatnosti organizacije;
- 2) ako u roku od 15 dana od osnivanja ne podnese zahtjev za upis u sudski registar;
- 3) ako otpočne s djelovanjem prije upisa, osim djelatnosti iz članova od 11. do 14. ovog zakona;
- 4) ako postupi protivno odredbi člana 20. ovog zakona.

Za prekršaj iz prethodnog stava kaznit će se i odgovorno lice u političkoj organizaciji novčanom kaznom od 1.000 KM.

Član 31.

Novčanom kaznom od 500,00 KM kaznit će se za prekršaj ovlašteno lice političke organizacije ako ne postupi po odredbi člana 23. stav 1. ovog zakona.

PRIJELAZNE I ZAVRŠNE ODREDBE

Član 32.

Političke organizacije čija su sjedišta u Distriktu, a koje su registrovane u Federaciji BiH ili Republici Srpskoj (u daljem tekstu: „entiteti“), dužne su podnijeti zahtjev za registraciju po odredbama ovog zakona u roku od 60 dana od dana stupanja na snagu ovog zakona.

Političke organizacije sa sjedištem u jednom od entiteta, a koje imaju kancelariju u Distriktu, dužne su registarskom sudu prijaviti adresu kancelarije u Distriktu, u roku od 60 dana od dana stupanja na snagu ovog zakona. Uz prijavu se podnosi ovjerena kopija rješenja o upisu u registar nadležnog entitetskog organa.

Političkoj organizaciji, koja ne postupi po odredbama stavova 1. i 2. ovog člana, bit će zabranjen dalji rad na teritoriji Distrikta. Postupak za zabranu rada pokreće se i sprovodi u skladu s odredbama od 24. do 26. ovog zakona.

Član 33.

Pravosudna komisija Distrikta će donijeti propise iz člana 16. u roku od 30 dana od dana stupanja na snagu ovog zakona.

Član 34.

Ovaj zakon stupa na snagu 3. oktobra 2002. Godine, a njegove izmjene i dopune 17. jula 2007. godine i 20. februara 2008. godine.